

'Proefdraai' Publico di Exposicion nobo tabata un éxito

Museo Arqueologico ta gradici tur voluntario y participante



ORANJESTAD

- Diadomingo, dia 29 di Maart, Museo Arqueologico Aruba a organiza un 'proefdraai' publico di su exposicion nobo na cual a participa mas cu 300 bishitante. Participantenan a duna nan 'feedback' door di papia cu e trahador y voluntarionan di Museo y yena un formulario. Voluntarionan hoben a entrevista publico y a haya comentario y sugerencia.

Ya a cuminsa 'verwerk' e 'feedback' y ta resalta cu bishitantenan a keda masha impresiona cu e parti interactivo di e exposicion.

E uso di tecnologia nobo pa duna informacion na diferente manera, a cai hopi na agrado di tanto hoben como adulto. Por ehempel e storianan cu por a scucha na e audiokiosk, screensnan cu video of unda e bishitante mes por primi un boton pa escoge di cual obheto e kier haya mas informacion.

Tambe e reconstruccion na escala di e cas di Indian, e "cueba" cu e proyeccionan di pintura riba baranca y tambe e regenbak historico, cu a ser incorpora den e sala di exposicion, a atrae hopi persona.



Aunque e no ta un atraccion nobo, e skeletnan Pre-ceramico y Ceramico den e sala di exposicion ariba a demostra cu ainda nan tin un atraccion "magico" riba tanto mucha como adulto. Un sugerencia cu a sobresali den e entrevistanan cu a ser haci

door di e hoben voluntarionan, tabata cu hopi kier a mira un canoa di berdad.

Por bisa cu en general e reaccion di e participantenan tabata hopi positivo. Tambe e sistema di entrada a funciona hopi bon y door di esey e fluho di bishitantenan tabata

agradabel.

Museo Arqueologico ta gradici tur voluntario cu a yuda pa haci e dia publico aki uno asina fructifero y alavez kier bisa danki na tur participante di e 'Proefdraai' Publico pa yuda Museo cu e evaluacion di su exposicion nobo.